

вый, царь римский, и Карул, великий царь, и Отто первый, и Индрик, первый римский царь покрепиша и мнози инии Священнаго царства начальници и царие, их же продолжно есть зде особне по именем вписати.

И яко Римскаго царства царие римстей церкви безчисленая блага подвижная и неподвижная назнаменоваша и даша, тако и мнози инии
 л. 518 нача||лници и князи иных стран и царств разных стран мира и царств в многих мира странах своим епископом, пастырем церкви божии, села стяжания за душъ своих и сродников своих спасение подаваша и даже доднесь по духовным дають, яко и зде видим в достойном Русском отечестве и иных странах мира, идеже церковь Христова основанна есть. И не токмо предреченные начальници просто церкви Христове стяжания подаваша, но от власти кесарския грамотами и писаними и златыми печатми устроиша, укрепиша,^{II, a} да ни един епископ, пастырь, или священник с села || или с стяжаний церковных дани давати должен будеть, но свободно вся стяжания имети будеть, ниже властелем дань давати, но властели епископом яко пастырем давати должни да будуть. Такожде устроиша и под казнью оставиша, дабы мирьстии человеци о вещех церковных не улагали, ниже в таковая вступалися, ниже им таковыя вещи приказуемы управляти противу воли пастырьския дерзаются, ниже мирьский человек в делех церковных и клиричьских судити, или искати будеть, ||
 л. 519 ниже на свидетельство ни взыскание на суде попущен достоинь быти противу клирика или в делех клиричьских и церковных. Сего ради аще таковая предреченная суть мирьским человеком възбранена, много паче и крепчае разумеется, да не церковная и клиричьская данная възмогуть отимати.

И на болшее уразумение предреченных, такожде последующих треба есть внимати словеса еуангилския яже пишутся, Лука, 22 глава,^б сице:
 л. 519 об. реща: Ничесоже. Рече || же им Исус: Но ныне иже имать мех, да възмет такожде и пиду, а иже не имать, да продасть ризу свою и купитъ меч. Они же реща: Господи, се меча зде два. В сих еуангилских словесех не будем спротивления помышляти словес, но по разному стоанию времени и по священному таиньству о Христове церкви разумети. Понеже рече Христос сия предреченная словеса учеником своим, да назнаменуеть и явить церковь свою в будущая времена при святых пастырех и отцех
 л. 520 временная и духовная наслед||ствовати стяжания и двема мечи стяжания защищати. Зде же разумети треба есть, еже мечь есть сугуб. Един мечь есть вещественый, его же имяше Петр апостол, егда отреза ухо Малху в вертограде, яко четься в Еуангилии в Христове страдании, той меч достоинь пастырем церковным имети на защищение церкви своея, даже и до своего кровопролития, аще токмо духовным мечем ничто же поспешествуютъ. Второй мечь есть духовный, его ж господь дасть Петру и будущим по нем, глаголя: Аще ни тако послушает || тя, да будеть ти, яко язычник и грешник, ими же словесы с властью вязати и решати дасть господь учеником своим отлучения и анафеме предания, и сию власть мы наричем мечем духовным в писаниих святых. Сим мечем церкви защищатись и оборонятись достоинь первее, — аще ли по третием наказании непослушны не творять повиновения и съпротивны пребудуть, не хотяще наказатись ни вый своих гордых пастырем подклонити и Христове пови-
 л. 521 нутись, тогда помощю плечий мирьских действо||вати могутъ, мечем вещественным, на отвращение силы спротивных.

Уже довольно и пространно в предреченных явлено есть, еже царем,

^{II, a} В ркп. вставка на нижнем поле. ^б На поле зачало 108.